

109 年全國語文競賽客家語朗讀文章國小學生組（四縣腔）

編號 02 號

【阿咪<sup>1</sup>】李夢花原作

吾屋下從來就毋識畜狗畜貓，一來係阿姆歸日仔做事無閒泊杈，又愛無閒煮三餐，二來係佢當愛淨俐，畜狗仔同貓仔驚怕會遭跳蚤。一直到老弟間房个天篷頂，逐暗晡一群老鼠在該走來走去，呼呼磅磅<sup>2</sup>吵到佢睡毋得，正高不將同上屋个鄰舍，捉一隻細貓子畜來打老鼠。

鄰舍个貓嫲這胎正養兩隻，一隻就係吾屋下這隻，灰色間<sup>3</sup>白色同豬肝色花刺花刺<sup>4</sup>，看起來當精靈、當得人惜，佢兜喊佢「阿咪」。另外該條柑仔色間白色，乜異靚，分雜貨店个叔姆捉去畜。阿爸講新捉來个貓仔，定著愛綯到有四支桌腳个下背幾日仔，恁樣正會認屋，阿爸就摻佢綯到桌腳下。正經有影哦！幾日仔放佢，阿咪就乖乖，毋會儘採走。

因為毋識畜過貓仔，阿姆乜毋知愛分佢食麼个？人講：貓愛食臊。阿姆就用四破魚攪飯飼。一站仔過後，阿爸講：「毋好分

佢食忒飽，慣勢咧就毋會去打老鼠。」聽雜貨店个叔姆講厥屋下該隻，就係食到肥固固仔，日日食飽睡、睡飽食，連老鼠在脣頭過，佢就目珠擘開睜一下，做佢睡。該幾日逐朝晨，阿爸就去豬砧買一坵豬肝分阿咪食。第一擺豬肝買轉來，阿姆愛拿來煮熟，阿爸煞煞講：「分貓仔食生豬肝，係愛佢慣食生个味緒，正會去打老鼠，該下二擺佢打著个老鼠，你愛煮熟正分佢食係無？」阿爸講个異有理，佢兜聽了哈哈大笑。

阿咪日時頭走到倉庫睡目，暗晡頭就係佢行動个時間，在暗摸脣疏个暗晡頭，看著佢个目珠仁，像兩粒青色个寶石樣仔當金當靚，灶下个黃蚩趨來趨去，佢一爪搭一隻，非常流掠。就毋知佢曉打老鼠無？毋過，自阿咪來了以後，老弟間房个天篷，就無老鼠在該跳舞哩。

毋多知仔，阿咪畜有十四年咧，照佢人个年齡換算，佢有七十零歲哩。該日阿咪懶甥甥仔無精神，食个東西又嘔出來，好得看過獸醫注射過，幾日仔就好吧。阿姆笑笑仔對阿咪講：「你同佢共樣，老咧。」阿咪當像聽得識樣仔，第二日打隻細老鼠挑挑放在灶下，像係愛摻阿姆講：「莫笑佢老刀嫲無鋼——奈毋何，佢還異慶哪！」動物除了毋會講話，佢兜同人共樣，係有感情有靈性个，還有該種毋認老个打拚精神啊。

<sup>1</sup> 阿咪：音 a' mi；貓的名字。

<sup>2</sup> 呼呼磅磅：音 bin bin bong bong；狀聲詞，形容老鼠在天花板跑動的聲響。

<sup>3</sup> 間：音 gam；摻雜調和。

<sup>4</sup> 花刺花刺：音 fa' la' fa' la'；花色混雜。

【大箍牯減肥記】曾菁怡原作

「哇！歸桌仔恁多好料仔！汽水、餅仔、披薩、雞卵糕、枝仔冰，還有佢盡好食个焗菜、雞髀<sup>1</sup>。」佢看到無瞞目，口涎水強強會跌下來，該兜好料仔像同佢撲手講：「遽遽來食，遽遽來食嘢！」佢煞煞抓一支香噴噴仔个雞髀，該油亮油亮个皮焙到喇喇，肉汁汀汀汀汀，實在還錫人哪！就在佢嘴擊到大大，準備咬啊下去該下，嘎聽著：「大箍牯，還毋跣床？讀書會赴毋掣哩！」全部个好料仔一下仔嘎毋見忒，原來，係發夢啊！有一息仔毋願，該雞髀無咬著，實在還打爽哦！

聽吾姆講，佢從細就異好嘴斗，生到肉卒卒仔，幼皮白肉，盡得人惜。公太就盡愛撚吾面頰卵，講佢像正打好个粿粿仔分人想愛咬一口。原本佢無感覺肥固固个身材有麼个毋好，但係該擺見笑个經驗分佢堅心愛減肥哩。

該日學校辦校慶活動，吾班級表演「三隻細豬仔」个話劇，佢係擔任豬大哥个角色。就在節目進行到豬大哥同豬二哥為著閃避大野狼，愛走去豬老弟个屋仔園該下，為著有緊張个氣氛，佢

盡命牯颯過去愛鑽入豬老弟个屋仔裡肚。麼人知，一下忒大力，豬老弟个屋仔嘎分佢撞橫下去，佢還仆在屋仔面頂，屎肫翹到半天高，緜繃繃仔个褲弓到暴線縫……。該時，鬧熱煎煎个禮堂忽然間變到一片恬靜，佢還聽得著自家砰砰砰个心跳聲，額頭流下來个汗水每一滴佢就感覺得著……，實在還見笑哦！愛仰結煞正好？落尾，有聲音摻佢解圍哩，佢遽遽企起來行到舞臺脣換褲；該聲音，毋係佢期待个拍手聲，係大家笑到歸身仔緊顫、目汁雙流个笑聲。

校慶結束該日，桌頂个乳茶、雞排全部分佢擲到垃圾桶，佢第一擺有恁強个決心，絕對愛減肥成功。佢去網路尋減肥个方法，大體係減量、減油、減糖，還愛配合適當个運動，故所該兜油漬漬仔<sup>2</sup>个焗菜、甜濟濟仔<sup>3</sup>个汽水、糖仔全部分佢拒絕，逐餐飯菜都食較清較齋兜仔，食到七分飽就好。佢還每日運動三十分鐘，行路、打球仔、跳索仔……，逐日做無共樣个變化。

一隻月過後，吾姆帶等佢去買新衫褲，每一領个尺寸都減兩號，阿姆講：「從今以後做毋得過喊你『大箍牯』咧。」「係啊！你愛喊佢『緣投哥』哩。」

大箍牯減肥，成功！

<sup>1</sup> 雞髀：音 gie' bi'；雞腿。

<sup>2</sup> 油漬漬仔：音 iu' ji ji e'；形容沾滿了油。

<sup>3</sup> 甜濟濟仔：音 tiam' ji' ji' e'；形容味道甜膩。

## 109 年全國語文競賽客家語朗讀文章國小學生組（四縣腔）

編號 06 號

### 【好空】徐子涵原作

人講，笑頭笑面個人較有人緣；佢講，會講客个細人仔較得人惜。係兩種加起來，就會變出當多好空个事情出來哦！

社區肚个老老嫩嫩，佢比吾姆還較熟事；社區肚个事情，乜比佢還較瞭解。成時攞兜仔菜、帶兜仔糖仔轉屋，騙阿姆講係佢買个，佢都會相信。因為連佢都想毋著，無緣無故有麼儕會分佢。無論係食个、著个、用个，抑係搞个，所有好空个，通棚都係佢好嘴碼膠禮貌換來个。

對門九十六歲个伯婆太講，這下个細人仔，毋知係畏羞抑係揭屎，盡少像佢恁有笑容、恁會同人相借問个，故所特別惜佢，盡阿謔佢。佢輒輒會攞手喊佢過去，拿兜仔零嗒分佢食，佢講就佢正有恁好空。同佢講話，全全愛用客話講，佢正聽得識，佢想怕係因為恁樣，正無細人仔愛同佢講話。三條巷仔个細人仔，就單淨佢一儕做得同佢謔多半點鐘久，無講花蓼哦！

莫看佢年紀還細，係自行車落鏈<sup>1</sup>、輪仔同球仔無風，佢自家就有辦法，毋使花錢去尋人搵手整、搵手嘮風。係愛打羽毛球，

<sup>1</sup> 落鏈：音 lau lien；鏈條脫落。

乜有大人同佢做伴搞，恁樣講，你就知吾个朋友有幾多、年齡層有幾闊哩！

細人仔自然就會搞共下，毋使加講，愛講个係，該兜鄰舍做麼个會恁惜佢呢？該係因為佢當笑面，會同人打嘴鼓，還會同人搵手。比將講搵手倒垃圾、拚資源回收个東西、講兜仔笑科分人笑、講兜仔令仔分佢兜揣、講兜仔生趣个事情分佢兜聽，就連老伯姆來賣菜，佢乜會搵手喊：「買菜哦～！愛買菜無呢？」微微末末，講都講毋得煞，吾个大人朋友就係恁樣從細交陪來个，連吾姆都當欽服。

對巷仔口左幹上去个有錢人家同公園起到當闊，新聞報導過後，就當多遊客來遶寮，漸漸仔乜有人來擺攤仔做生理。佢輒輒會行兼去，人客來就搵手，無人客就打嘴鼓，毋多知仔乜熟事哩！異多遊客聽著佢講客，會因為試著當親切，就買加兜仔，你講，有生趣無？

佢從來就無想著面帶笑容膠講客會有麼个好空，毋過確實帶分佢異多好空！總講，就係一種當湛斗<sup>2</sup>个感覺。

<sup>2</sup> 湛斗：音 zam deu`；美好、很好。

## 109 年全國語文競賽客家語朗讀文章國小學生組（四縣腔）

編號 07 號

### 【剃頭】張美容原作

前幾日仔去剃頭店剃頭，看著一個兩、三歲个細人仔，為著剃頭噉到噉殺天<sup>1</sup>，大人細子全部都搥到汗流脈絡，實在還衰過哪。佢這下較大咗，剃頭該下毋敢噉，毋過還係恁驚剃頭，乜共樣恁惱剃頭！

佢驚剃頭，係因為佢當無膽，驚師傅手項該支剪刀摺剃頭刀。見擺一坐落凳頂，圍好剃頭帕，看著師傅擎等剪刀對等佢，佢就開始幅幅掣<sup>2</sup>，試著過忒千年恁久頭那毛正剪好，正想愛敵一下大氣定定，師傅又擎等利利个剃頭刀愛來刮吾腦之背<sup>3</sup>个毛腳，這下還較得人畏哩。佢驚到頸根緊跣、尿肫在凳頂扭來扭去，師傅緊刮緊咄<sup>4</sup>佢毋好停動，無奈何，佢牙根齧等、拳頭嫵搭等，由在人剝割。係走得得，佢定著起腳滑走<sup>5</sup>，一分鐘就毋停跔。唉！剃頭實在得人驚！

到三、四年生起勢，膽較在<sup>6</sup>哩，無恁驚剃頭，嘎變做惱剃

頭，因為師傅該張嘴當得人惱，佢總係在摺佢剃頭該時節，講講擎一千擔有个無个。可能大家係老鄰舍倘<sup>7</sup>熟事也，佢長透緊剃緊同佢打嘴鼓，一下仔問：「若頭那毛落麼个肥，仰會生到恁靚、恁多？」一下仔又講：「營養毋好專門搥到頭那毛去，愛食較高太兜仔正有影哪！毋好像矮嫵車樣仔矮佻佻仔<sup>8</sup>。」佢面皮薄、驚見笑，長間目珠眨等詐無聽著，一肚懊惱<sup>9</sup>想：「仰結煞！脣頭个人定著在該笑佢咗啦！還惱！還惱！實在還惱剃頭。」

最冤枉个係，有一擺師傅毋知仰仔，剪刀一溜<sup>10</sup>，嘎摺吾个耳公剪溜皮，跔等就出血。師傅緊同佢膏藥仔，緊嘍嘍啣啣講：「頭那毛恁多，當毋好剪。」仰形嘎變做佢毋著！轉到屋下想愛同阿姆做嬌，無想著阿姆毋單淨無安慰佢，顛倒罵佢講：「毋恬恬坐等分人剃哪！耳公無分人剪忒就異好哩。」限勢佢愛噉毋得嘴扁，聽著阿姆恁樣講，黏時「哇」一聲噉出來。係做得，佢甘願鬢頭絞髻<sup>11</sup>也無愛去剃頭。

剃頭个齣事，幾隻月就愛再過來一擺，還艱苦哪！佢日日想、日日望，想望煞煞大，做得像大人恁樣，去電毛店剪頭那毛，腳交等，有冷氣好吹、有人同你捉龍，還有人滄茶分你食，毋知幾好哪！

<sup>1</sup> 噉殺天：音 veˋ vɔŋˋ sadˋ tienˋ；高聲呼叫。

<sup>2</sup> 幅幅掣：音 bid bid cadˋ；不停發抖。

<sup>3</sup> 腦之背：音 noˋ ziiˋ boi；後腦杓。

<sup>4</sup> 咄：音 doiˋ；喝斥。

<sup>5</sup> 起腳滑走：音 hiˋ giɔŋˋ vad zeuˋ；拔腿就跑。

<sup>6</sup> 在：音 cai；穩固。

<sup>7</sup> 倘：音 tiɔŋˋ；太。

<sup>8</sup> 矮佻佻仔：音 aiˋ dudˋ dudˋ eˋ；矮嘟嘟的。

<sup>9</sup> 懊惱：音 au nau；懊惱。

<sup>10</sup> 溜：音 tiu；滑開。

<sup>11</sup> 鬢頭絞髻：音 nungˋ teuˋ gauˋ gi；蓬頭散髮。

編號 02 號

【阿咪<sup>1</sup>】李夢花原作

佢屋下從來就毋識畜過狗仔、貓仔，一來係阿姆歸日仔做事無閒直掣，還愛無閒煮三餐，二來係佢盡好淨，畜狗仔同貓仔驚怕會遭跳蚤。一直到老弟間房个天棚頂，每暗晡一群老鼠仔在該走來走去，呼呼磅磅<sup>2</sup>吵到佢睡毋得，正高不將同上屋个鄰舍，扭一隻細貓子畜來打老鼠。

鄰舍个貓嫲這胎正降兩隻，一隻就係佢屋下這貓子，老鼠色間<sup>3</sup>等白色同豬肝色花喇花喇<sup>4</sup>，看起來蓋精靈、盡得人惜，佢等喊喊佢「阿咪」。另外該隻柑仔色間等白色，乜異靚，分雜貨店个姆姆扭去畜。阿爸講新扭來个貓仔，定著愛綯到有四支桌腳个下背幾日仔，恁仔正會認屋，阿爸就同佢綯到桌腳下。斷真有影哦！幾日後放佢，阿咪就一等乖，毋會儘採走。

因為毋識畜過貓仔，阿姆乜毋知愛分佢食麼个？人講：貓愛食腥。阿姆就用四破魚攪飯飼。一站仔過後，阿爸講：「毋好分

佢食忒好、食忒飽，慣序哋就毋會去打老鼠。」聽雜貨店个姆姆講佢屋下該隻，就係食到肥固固仔，日日食飽睡、睡飽食，連老鼠仔對脣口過，佢淨目珠擘開看一下，做佢睡。該幾日个朝晨，阿爸就去豬砧買一塊豬肝分阿咪食。第一擺豬肝買歸來，阿姆愛拿來煮熟，阿爸共快講：「分貓仔食生豬肝，係愛佢慣序食生个味，恁仔正會去打老鼠，佢下二擺打著个老鼠，你愛煮熟正分佢食麼？」阿爸講个異有理，佢等聽哋噯啊會死。

阿咪日時頭走到倉庫睡目，暗晡頭就係佢行動个時間，在暗摸脣疏个暗晡頭，看著佢个目珠仁，像兩粒青色个寶石樣盡金盡靚，灶下个黃蜚趁來趁去，佢一爪抓一隻，一等流掠。就毋知佢曉得打老鼠無？毋過，自阿咪來哋過後，老弟間房个天棚，就無老鼠仔在該跳舞哋。

毋多知仔，阿咪畜有十四年哋，照佢等人个年紀算，佢有七十零歲哋。該日阿咪懶甥甥仔無精神，食个東西又翻出來，好得看過獸醫注射過，幾日仔就好哋。阿姆噯噯仔對阿咪講：「你同佢共樣，老哋！」阿咪蓋像聽得識樣仔，第二日打一隻細老鼠別試放在灶下，像係愛同阿姆講：「莫笑佢老刀嫲無鋼——奈毋何，佢還蓋壁哪！」動物除哋毋會講話，佢等同人共樣，係有感情有靈性个，還有該種毋認老个打拚精神啊！

<sup>1</sup> 阿咪：音 a' mi；專有名詞。貓的名字。

<sup>2</sup> 呼呼磅磅：音 bin' bin' bong' bong'；狀聲詞。形容老鼠在天花板亂竄的聲響。

<sup>3</sup> 間：音 gam；混合摻雜。

<sup>4</sup> 花喇花喇：音 fa' la' fa' la'；形容顏色混雜的樣子。

【大箍牯減肥記】曾菁怡原作

「哇！歸桌仔恁多好料！汽水、餅仔、披薩、雞卵糕、枝仔冰，還有偌盡好食个炸个同雞髀。」偌看到無瞞目，口涎水都會跌下來也，該兜好料像同偌搵手講：「共快來食，共快來食哦！」偌趕緊抓一支噴香个雞髀，該黃蠟蠟仔个皮炕到喇喇，肉汁汀汀汀汀，實在還錫人啊！就在偌嘴擘到大大，準備咬啊下去該下，嘎聽著：「大箍牯，還毋玩床？會赴毋掣讀書也！」全部个好料一下仔嘎毋見核，原來，係發夢啊！有一息仔毋甘願，該雞髀無咬著，實在還浪核哦！

聽吾姆講，偌從細就盡好嘴斗，生到肥嘟嘟仔，幼皮白肉，盡得人惜。公太就盡愛捏吾面頰卵，講偌像正打好个粿粿仔分人想愛咬一口。原本偌無感覺肥固固个身材有麼个毋好，但係該擺見笑个經驗分偌決心愛減肥也。

該日學校辦校慶活動，吾班級表演「三隻豬仔」个話劇，偌擔任豬大哥个角色。就在節目進行到豬大哥同豬二哥為著閃避大野狼，愛走去豬老弟个屋仔屏該下，為著愛有緊張个氣氛，偌潑命牯颯過去愛透入豬老弟个屋仔裡背。哪知得，一下仔忒大力，

豬老弟个屋仔嘎分偌撞橫下去，偌還仆啊在屋仔頂頂，屎肫翹到半天高，纏繃繃个褲弓到暴線縫。該時，鬧熱煎煎个禮堂忽然間變到十分恬靜，偌還聽得著自家砰砰砰个心跳聲，額頭流下來个汗水每一滴，偌就感覺得著，實在還見笑哦！愛仰結煞正好？落尾，有聲音同偌解圍也，偌共快企起來行到舞臺脣換褲。該聲音，毋係偌期待个拍手聲，係大家嗆到歸身仔緊顫、目汁緊流个笑聲。

校慶結束該日，桌頂个乳茶、雞排全部分偌擲到地圾桶，偌第一擺有恁堅定个決心，絕對愛減肥成功。偌去網路尋減肥个方法，大概係減量、減油、減糖，還愛配合適當个運動，故所該兜油漬漬仔个炸个東西、甜滋滋仔个汽水、糖仔一概分偌拒絕，每餐飯菜都食過清過齋一息仔，食到七分飽就好。偌還每日運動三十分鐘，行路、打球仔、跳索仔……每日做無共樣个變化。

一隻月過後，吾姆帶等偌去買新衫褲，每一領都減兩個尺寸，阿姆講：「從今以後做毋得過喊你『大箍牯』也。」「係啊！你愛喊偌『緣投哥』也。」

大箍牯減肥，成功！

編號 06 號

【好空】徐子涵原作

人講，笑頭笑面個人過有人緣；佢講，會講客个細人仔過得人惜。係兩種加啊起來，就會變出蓋多好空个事情出來哦～！

社區肚个老嫩大細，佢比吾姆還過熟事；社區肚个事情，乜比佢還過瞭解。下把仔攞兜仔菜、帶兜仔糖仔歸屋下，騙阿姆講係佢買个，佢都會相信。因為連佢都想毋著，無緣無故有麼人會分佢。無論係食个、著个、用个，抑係搞个，所有好空个，聚概<sup>1</sup>都係佢好嘴碼同禮貌換來个。

對門九十六歲个阿太講，這下个細人仔，毋知係畏相抑係揭屎，盡少像佢恁有笑容、恁會同人相借問个，故所特別惜佢，盡說佢。佢輒輒會攞手喊佢過去，拿兜仔零嗒分佢食，佢講就佢正有恁好空。同佢講話，一概愛用客話講，佢正聽得識，佢想怕係因為恁仔，正無細人仔愛同佢講話。三條巷仔个細人仔，就單淨佢一個人做得同佢謔哆半點零鐘，無講花蓼哦～！

莫看佢年紀還細，係自行車毆<sup>2</sup>鏈、輪仔同球仔係無風，佢自

家就有辦法毋使花錢去尋人搵手整、搵手嘮風。係愛打羽毛球，乜有大人儕陪佢搞，恁仔講，你就知佢个朋友有幾多、年齡層有幾闊吔！

細人仔自然就會搞共下，毋使加講，愛講个係，該兜鄰舍做麼个會恁惜佢呢？該係因為佢盡笑面，會同人打嘴鼓，還會同人搵手。比將講搵手倒地坵、拚資源回收个東西、講兜仔笑科分人嘍、講兜仔令仔分佢等揣、講兜仔生趣个事情分佢等聽，就連老伯姆來賣菜，佢乜會搵手喊：「買菜哦～！愛買菜無？」微微末末，講都講毋得煞，佢个大人朋友就係恁仔從細交陪來个，連吾姆都蓋佩服。

對巷仔口左幹上去个有錢人家同公園起啊盡闊，新聞報導過後，就蓋多人客來遶寮，漸漸仔乜有人來擺攤仔做生理。佢輒輒會行兼去，人客來就搵手，無人客就打嘴鼓，毋多知仔乜熟事吔！盡多人客聽著佢講客，會因為感著蓋親切，就買加兜仔，你講，有生趣無？

佢從來就無恁著面帶笑容同講客會有麼个好空，毋過確實帶分佢盡多好空！總講，就係一種蓋格式<sup>3</sup>个感覺。

<sup>1</sup> 聚概：音 qiug` koi`；全部。

<sup>2</sup> 毆：音 lod`；脫落。

<sup>3</sup> 格式：音 gied` siid`；形容事情或物體非常好。

【剃頭】張美容原作

前幾日去剃頭店剃頭，看著一個兩、三歲個細人仔，為著剃頭噉到噉殺天<sup>1</sup>，大大細細全部斯搥到汗流脈絡，實在還衰過哪！佢這下過大咗，剃頭該時毋敢噉，毋過還係盡驚剃頭，乜共樣恁惱剃頭！

佢驚剃頭，係因為佢盡無膽，驚師傅手項該支剪刀同剃頭刀。見擺一坐啊凳仔項，同好剃頭個措裙，看著師傅拿等剪刀對等佢，佢就開始緊掣<sup>2</sup>，感著過核千年恁久毛正剪好，正想啟下氣頭，師傅又拿等利利個剃頭刀愛來刮佢腦之背<sup>3</sup>個毛腳，這下還過得人畏咗。佢驚到頸根緊鉤、屎肫在凳仔項扭上扭下，師傅一頭刮、一頭咄佢毋好停動，無奈勢何，佢牙根齧等、拳頭嫵搭等，任在人剷割。係走得得，佢定著落尾仔瀉，一分鐘就毋停跔。唉！剃頭實在得人驚！

到三、四年生起勢，膽過在<sup>4</sup>咗，無恁驚剃頭，嘎變啊惱剃

頭，因為師傅該張嘴蓋得人惱，佢總係在同佢剃頭該時，講擊著一大波籬有个無个。可能大家係老鄰舍忒熟事咗，佢蓋輒緊剃緊同佢打嘴鼓，一下問：「你个頭那毛掖麼个肥？佢會生到恁靚、恁多？」一下仔又講：「營養毋好專門搥到頭那毛去，愛食過高大兜仔正有影哪！毋好像矮牯鯽樣矮佢仔<sup>5</sup>。」佢面皮薄、驚見笑，目珠不時眨等詐無聽著，一肚屎懊躁想：「佢結煞！脣口个人定著在該噉佢咗啦！還惱！還惱！實在還惱剃頭。」

最冤枉个係，有一擺師傅毋知佢仔，剪刀一溜<sup>6</sup>，嘎同佢个耳公剪一個空，血黏時流出來。師傅緊同佢膏藥仔，緊嘍嘍咿咿个講：「頭那毛恁多，蓋毋好剪。」佢仔嘎變到佢毋著！歸到屋下想愛同阿姆使妮，無想著阿姆毋單只無安慰佢，顛倒罵佢講：「毋恬恬坐等分人剃哪！耳公無分人剪核就盡好咗。」限勢佢愛噉都毋得嘴扁，聽著阿姆恁仔講，黏時「哇！」一聲噉出來。係做得，佢甘願做長毛賊<sup>7</sup>乜無愛去剃頭。

剃頭个戲齣，幾個月就愛再過來一擺，還艱苦哪！佢日日想、日日望，想望遠啊大，做得像大人樣，去電毛店剪頭那毛，腳交等，有冷氣好吹、有人同你捉背筋，還有人斟茶分你食，毋知幾好仔哪！

<sup>1</sup> 噉殺天：音 veˋ vongˋ sadˋ tienˋ；大聲哭喊

<sup>2</sup> 緊掣：音 ginˋ cadˋ；不停發抖。

<sup>3</sup> 腦之背：音 noˋ ziiˋ boi；後腦杓。

<sup>4</sup> 在：音 cai；穩固。

<sup>5</sup> 矮佢仔：音 aiˋ dudˋ dudˋ eˋ；矮嘟嘟的。

<sup>6</sup> 溜：音 liu；滑開。

<sup>7</sup> 長毛賊：音 congˋ moˋ ced；形容像盜賊一樣披頭散髮。



【阿咪<sup>1</sup>】李夢花原作

佢屋下從來就毋識畜狗畜貓仔，一來係阿姆歸日做事無閒直掣，又愛無閒煮三餐，二來係佢當愛淨俐，畜狗摻貓仔驚怕會避跳蚤。一直到老弟間房个天篷頂，逐暗晡一群老鼠在該走來走去，並並磅磅<sup>2</sup>吵到佢睡毋得，正高不將摻上屋个鄰舍，捉一條細貓子畜來打老鼠。

鄰舍个貓嫲這胎正降兩條，一條就係佢屋下這條，灰色間<sup>3</sup>白色摻豬肝色花刺花刺<sup>4</sup>，看起來當精靈、當得人惜，佢兜喊佢「阿咪」。另外該條柑仔色間白色，乜已靚，分雜貨店个叔姆捉去畜。阿爸講新捉來个貓仔，定著愛絢在有四支桌腳个下背幾日仔，恁樣正會認屋，阿爸就摻佢絢到桌腳下。正經有影哦！幾日仔放佢，阿咪就乖乖，毋會亂採走。

因為毋識畜過貓仔，阿姆乜毋知愛分佢食麼个？人講：貓愛食臊。阿姆就用四破魚攪飯飼。一站仔過後，阿爸講：「毋好分

佢食忒好、食忒飽，慣勢咧就毋會去打老鼠。」聽雜貨店个叔姆講佢屋下該條，就係食到肥固固，日日食飽睡、睡飽食，連老鼠在脣頭過，佢斯目珠擘開睜一下，做佢睡。該幾日逐朝晨，阿爸就去豬砧買一坵豬肝分阿咪食。第一擺豬肝買轉來，阿姆愛拿來煮熟，阿爸煞煞講：「分貓仔食生豬肝，係愛佢慣食生个味，正會去打老鼠，該下二擺佢打著个老鼠，你愛煮熟正分佢食係無？」阿爸講个已有理，佢兜聽了哈哈大笑。

阿咪日時頭走到倉庫睡目，暗晡頭就係佢行動个時間，在暗摸胥疏个暗晡頭，看著佢个目珠仁，像兩粒青色个寶石樣當金當靚，灶下个蜞蜚仔越來越去，佢一爪搭一隻，非常流掠。就毋知佢曉打老鼠無？毋過，自阿咪來了以後，老弟間房个天篷，就無老鼠在該跳舞咧。

毋多知仔，阿咪畜有十四年咧，照佢人个年紀算，佢有七十零歲咧。該日阿咪懶甥甥仔無精神，食个東西又嘔出來，好得看過獸醫、注射過，幾日仔就好咧。阿姆笑笑仔對阿咪講：「你摻佢共樣，老咧。」阿咪當像聽得識樣，第二日打條細老鼠挑挑放在灶下，像係愛摻阿姆講：「莫笑佢老刀嫲無鋼——奈毋何，佢還已慶哪！」動物除了毋會講話，佢兜摻人共樣，係有感情、有靈性个，還有該種毋認老个打拚精神啊！

<sup>1</sup> 阿咪：音 a+ mi；專有名詞。貓的名字。

<sup>2</sup> 並並磅磅：音 binˊ binˊ bongˊ bongˊ；狀聲詞。形容老鼠在天花板跑動的聲響。

<sup>3</sup> 間：音 gamˊ；混合摻雜。

<sup>4</sup> 花刺花刺：音 faˊ laˊ faˊ laˊ；形容顏色混雜花花的樣子。

109 年全國語文競賽客家語朗讀文章國小學生組（海陸腔）

編號 3 號

### 【大籬牯減肥記】曾菁怡原作

「哇！歸桌恁多好料！汽水、餅、披薩、雞卵糕、枝冰，還有佢最好食个焗菜、雞髀。」佢看到無瞞目，口水強強會跌下來，該兜好料像人摻佢攞手講：「遽遽來食，遽遽來食啲！」佢煞煞抓一支香噴噴个雞髀，該油光油光个皮焙到赤赤，肉汁汀汀汀汀，實在還錫人哪！就在佢嘴擘到大大，準備咬下去該下，嘎聽著：「大籬牯，還毋翫床？讀書會赴毋著咧！」全部个好料一下嘎毋見忒，原來，係發夢啊！有一息仔毋願，該雞髀無咬著，實在還打爽哦！

聽佢姆講，佢從細就已好嘴斗，生到肥卒卒仔，幼皮白肉，當得人惜。公太就最愛捏佢个面頰卵，講佢像正打好个粢粢樣，分人想愛咬一口。本旦佢無感覺肥固固个身材有麼个毋好，毋過該擺見笑个經驗分佢決心愛減肥咧。

該日學校辦校慶活動，佢个班級表演「三隻豬子」个話劇，佢係擔任豬大哥个角色。在節目進行到豬大哥摻豬二哥為著閃避大野狼，愛走去豬老弟个屋肚園該下，為著有緊張个氣氛，佢盡命牯颯過去愛鑽落豬老弟个屋肚。麼人知，一下忒大力，豬老弟

个屋嘎分佢撞橫忒去，佢還仆在屋面頂，屎肱翹到半天高，纏繃繃个褲弓到暴線縫，該時，鬧熱煎煎个禮堂忽然間變到肅恬<sup>1</sup>，佢還聽得著自家砰砰滾个心跳聲，額頭流下來个每一滴汗水，就分佢感覺得著實在還見笑哪！愛仰結煞正好？背尾，有聲音摻佢解圍咧，佢遽遽企起來行到舞臺脣頭換褲，該聲音，毋係佢期待个拍手聲，係大家笑到歸身緊顫、目汁雙流个笑聲。

校慶結束該日，桌頂个乳茶、雞排全部分佢擲到垃圾桶，佢第一擺有恁堅定个決心，絕對愛減肥成功。佢去網路尋減肥个方法，大體係減量、減油、減糖，還愛配合適當个運動，所以該兜油膩膩个焗菜、甜漬漬<sup>2</sup>个汽水、糖仔全部分佢拒絕，逐餐飯菜都食較清較齋兜，食到七分飽就好。佢還逐日運動三十分鐘，行路、打球仔、跳索仔……，逐日做無共樣个變化。

一隻月過後，佢姆渡等佢去買新衫，逐領个尺寸都減忒兩號，阿姆講：「從今以後做毋得再過喊你『大籬牯』咧。」「係啊！你愛喊佢『緣投哥』哩啲。」

大籬牯減肥，成功！

<sup>1</sup> 肅恬：音 sog diam`；形容安靜無聲的樣子。

<sup>2</sup> 甜漬漬：音 tiam zid` zid`；味道很甜。

109 年全國語文競賽客家語朗讀文章國小學生組（海陸腔）

編號 6 號

【好空】徐子涵原作

人講，笑頭笑面個人較有人緣；佢講，會講客個細人仔較得人惜。係兩種加起來，就會變出當多好空個事情來哦！

社區肚個老老嫩嫩，佢比佢姆還較熟事；社區肚個事情，乜比佢還較瞭解。成時攞兜菜、帶兜糖仔轉屋，騙阿姆講係佢買個，佢都會相信。因為連佢都想毋著，無緣無故有麼儕會分佢。無論係食個、著個、用個，抑係搞個，所有好空個，通棚都係佢好嘴碼摺禮貌換來個。

對門九十六歲個阿太講，這下個細人仔，毋知係畏羞抑係搵屎，盡少像佢恁有笑容、恁會摺人相借問個，所以特別惜佢，盡安謐佢。佢長下會攞手喊佢過去，拿兜零嗒分佢食，佢講就佢正有恁好空。摺佢講話，全全愛用客話講，佢正聽得識，佢想怕係因為恁樣，正無細人仔愛摺佢講話。三條巷仔個細人仔，斯單淨佢一儕做得摺佢謔多半點鐘久，無講花舌哦！

莫看佢年紀還細，係自行車落鏈，抑係輪仔摺球仔無風，佢自家就有辦法，毋使花錢去尋人搵手整、搵手嘮風。係愛打羽毛球，乜有大人伴陪佢搞，恁樣講，你就知佢個朋友有幾多、年齡

層有幾闊咧！

細人仔自然就會搞共下，毋使加講，愛講個係，該兜鄰舍做麼個會恁惜佢呢？該係因為佢當笑面，會摺人打嘴鼓，還會摺人搵手。比論講搵手倒垃圾、拚資源回收個東西、講兜笑科分人笑、講兜令仔分佢兜揣、講兜生趣個事情分佢兜聽，就連老伯姆來賣菜，佢乜會搵手喊：「買菜哦！愛買菜無？」微微末末，講都講毋得煞，佢個大人朋友就係恁樣從細交陪來個，連佢姆都當佩服。

對巷仔口左幹上去個有錢人家摺公園起到當闊，新聞報導了後，斯當多遊客來遠奈，漸漸仔乜有人來擺攤仔做生理。佢輒輒會行兼去，人客來就搵手，無人客就打嘴鼓，毋多知仔又熟事咧！已多遊客聽著佢講客，會因為試著當親切，就加買兜仔，你講，有生趣無？

佢從來就無想著面帶笑容摺講客會有麼個好空，毋過確實帶分佢盡多好空！總講，就係一種當湛斗個感覺。

【剃頭】張美容原作

前幾日去剃頭店剃頭，看著一個兩、三歲個細人仔，為著剃頭噉到噉殺天<sup>1</sup>，大人細子全部斯搥到汗流脈絡，實在還衰過哪。佢這下較大咧，剃頭該時毋敢噉，毋過還係恁驚剃頭，乜共樣恁惱剃頭！

佢驚剃頭，係因為佢當無膽，驚師傅手叮該支剪刀摺剃頭刀。見擺一坐落凳頂，筒好剃頭帕，看著師傅擎等剪刀對等佢，佢就開始嘩嘩掣<sup>2</sup>，試著過忒千年恁久毛正剪好，堵堵想故下大氣定，師傅又擎等利利個剃頭刀愛來刮佢腦屎背<sup>3</sup>個毛腳，這下還較得人畏咧。佢驚到頸根緊鉤、屎肫在凳頂扭上扭下，師傅一頭刮、一頭咄<sup>4</sup>佢毋好停動，無奈何，佢牙根齧等、拳頭嫵搭等，由在人剝割。係走得得，佢定著起腳花走<sup>5</sup>，一分鐘就毋停跔。唉！剃頭實在得人驚！

到三、四年生起勢，膽較在<sup>6</sup>咧，無恁驚剃頭，嘎變到惱剃

頭，因為師傅該張嘴當得人惱，佢總係在摺佢剃頭該時，講講掣一千擔有个無个。可能大家係老鄰舍昶<sup>7</sup>熟事咧，佢長下緊剃緊摺佢打嘴鼓，一下問：「你個頭那毛落麼个肥，仰會生到恁靚、恁多？」一下又講：「營養毋好專門搵到頭那毛去，愛食較高大兜正有影哪！毋好像矮嫵車樣矮佢佢仔<sup>8</sup>。」佢面皮薄、驚見笑，長下目珠眨等詐無聽著，一肚懊躁想：「仰結煞！脣頭个人定著在該笑佢咧啦！還惱！還惱！實在還惱剃頭。」

最冤枉个係，有一擺師傅毋知仰般，剪刀一溜<sup>9</sup>，嘎摺佢个耳砵剪隻空，血黏時流出來。師傅一頭摺佢膏藥仔，一頭嘍嘍啣啣講：「頭那毛恁多，當毋好剪。」仰般嘎變成佢个錯！轉到屋下想愛摺阿姆做嬌，無想著阿姆毋單淨無安慰佢，顛倒罵佢講：「毋恬恬坐等分人剃哪！耳空無分人剪忒斯已好咧。」限勢佢愛噉毋得嘴扁，聽著阿姆恁樣講，黏皮「哇」一聲噉出來。係做得，佢甘願鬢頭髻披<sup>10</sup>乜無愛去剃頭。

剃頭个齣事，幾隻月斯愛再過來一擺，還艱苦哪！佢日日想、日日望，想望煞煞大，做得像大人樣，去電毛店剪頭那毛，腳交等，有冷氣好吹、有人摺你捉龍，還有人滄茶分你食，毋知幾好哪！

<sup>1</sup> 噉殺天：音 ve vong sad tien`；大聲哭喊

<sup>2</sup> 嘩嘩掣：音 bid bid chad；不停發抖。

<sup>3</sup> 腦屎背：音 no` shi` boi`；後腦杓。

<sup>4</sup> 咄：音 doi；喝斥。

<sup>5</sup> 起腳花走：音 hi` giog fa` zeu`；拔腿就跑。

<sup>6</sup> 在：音 cai<sup>+</sup>；穩固。

<sup>7</sup> 昶：音 tiong`；太。

<sup>8</sup> 矮佢佢仔：音 ai` dud dud er；矮嘟嘟的。

<sup>9</sup> 溜：音 tiu`；滑開。

<sup>10</sup> 鬢頭髻披：音 nung teu gi` pai`；披頭散髮。

【阿咪<sup>1</sup>】李夢花原作

吾屋家自從都毋識畜狗畜貓，一來係阿姆歸日愛做事，又愛煮三餐，搵都無閒濟借咧，二來阿姆當淨俐相，驚怕畜狗、畜貓會遶跳蚤。直直到老弟間房个天蓬頂<sup>2</sup>，逐暗晡有一陣老鼠在該走相逐，乒乒砰砰<sup>3</sup>吵都佢睡毋得，高不將正同上屋个鄰舍，分一隻細貓子畜來好打老鼠。

鄰舍个貓嫲這網正養著兩隻，一隻係吾屋家這隻，灰色間核<sup>4</sup>白色同豬肝色花籬花籬<sup>5</sup>，看著當精靈又當得人惜，吾等喊佢「阿咪」。另外該隻柑色間核白色，也已靚，分雜貨店个叔姆捉去畜。阿爸講新捉來个貓，定著愛絢在有四支桌腳个桌下幾日過，恁泥貓正會認屋，阿爸同佢絢在桌腳下。正經有影哦！幾日過後放佢，阿咪斯乖乖，毋會岐岐走<sup>6</sup>咧！

因致毋識畜過貓，阿姆毋知愛餵佢食麼个？聽人講：貓愛食

臭臊。阿姆斯用四破脯攪飯餵佢。一站過，阿爸講：「毋好分佢食忒好、食忒飽，食慣勢咧斯毋會去打老鼠。」聽雜貨店个叔姆講厥屋家該隻，斯係食去肥律律，日日食飽睡、睡飽食，老鼠對邊脣過，單淨目珠擘開睜一下，又做佢睡。該幾日逐朝脣，阿爸跔跔去豬砧買一坵豬肝分阿咪食。第一擺豬肝買轉來，阿姆愛拿來煮熟，阿爸遽遽講：「分貓食生豬肝，係愛佢慣勢生東西个味瑞，正會去打老鼠，下次擺佢若打著个老鼠，敢講你愛煮熟正分佢食係無？」阿爸講个已有理，吾等聽去哈哈大笑。

阿咪日時頭走去倉庫睡目，暗晡頭斯係佢活動个時間，在暗摸脣疏个暗晡頭，厥个目珠仁，像兩粒青色个鑽石，當金、當靚，灶下个黃蚩走來走去，佢一出爪斯搭著一隻，實在溜掠。單淨毋知佢曉打老鼠無？毋過，自阿咪來了後，老弟間房个天蓬，毋識過聽著老鼠在該跳舞咧。

毋多知，阿咪畜有十四年咧，照偲等人个歲數來算，有七十零歲哩啲。該日看佢懶蜈蚣無精神，食个東西又做下翻出來，好得看過獸醫注射，幾日斯好咧。阿姆笑笑同阿咪講：「你同偲共樣，老咧！」阿咪當像聽得識个樣，第二日打著一隻細老鼠挑挑放在灶下，像係愛同阿姆講：「莫笑偲老刀嫲無鋼——奈毋何，偲還已慶哪！」動物除了毋會講話，厥等同人共樣，有感情、有靈性，還有該種毋認老、毋認輸个精神哦！

<sup>1</sup> 阿咪：音 a+ mi+；專有名詞。貓的名字。

<sup>2</sup> 天蓬頂：音 tien+ bong` den^；天花板上。

<sup>3</sup> 乒乒砰砰：音 bin` bin` bong` bong`；狀聲詞。形容老鼠在天花板跑動的聲響。

<sup>4</sup> 間核：音 gam` hed`；混合摻雜。

<sup>5</sup> 花籬花籬：音 fa+ lo+ fa+ lo+；形容顏色混雜花花的樣子。

<sup>6</sup> 岐岐走：音 kia+ kia+ zeu^；到處亂跑。

【大箍牯減肥記】曾菁怡原作

「哇！歸桌恁多好料！汽水、餅、披薩、雞卵糕、枝冰，還有佢盡好食个焗菜、雞髀。」佢看都無瞞目，口涎水硬硬會跌落來咧，該兜好料已像同佢攞手講：「遽遽來食，遽遽來食哦！」佢遽遽擎一支香噴噴个雞髀，該油臘油臘个皮焙去赤赤赤，肉汁汀汀汀汀，實在還錫人食哪！佢嘴擘大大，正愛咬落去該下，嘎聽著：「大箍牯，還毋翫床？讀書會赴毋掣咧！」好料一下毋見撇咧，原來，係發夢啊！佢有一屑毋甘願，該雞髀無咬著，實在還打爽哪！

聽吾姆講，佢自細斯已好嘴斗，生來肥漬漬，肉菜好白浮<sup>1</sup>，真得人惜。阿太盡愛捏吾面頰卵，講像正打好个粿粿，分人想愛咬一口。原旦佢試著肥律律个身材也無麼个毋好，毋過該擺見笑个經驗，分佢堅心愛減肥。

該日學校舉辦校慶活動，吾班級表演「三隻豬子」个話劇，佢擔任豬大哥个角色。在節目進行到豬大哥同豬二哥為著走閃大野狼，愛去豬老弟厥屋家因該下，為著愛製造緊張个氣氛，佢盡

命走過去，想愛鑽入豬老弟厥屋肚。哪會知，一下使忒大力，豬老弟个屋嘎分佢撞橫撇，還仆在屋頂，屎肫孔去半天高，緜繃繃个褲嘎弓暴撇……一下那，鬧熱濟借个禮堂玄玄風嘎恬芍芍，單淨聽著自家心臟砰砰滾个聲，額頭流落來个汗水，逐點都分佢試著……實在還見笑哦！愛仰結煞正好？臨尾，有人出聲同佢解圍咧，佢遽遽企翫來行到舞臺昏換褲；該聲說，毋係佢期待个拍手聲，係大家笑去歸身緊顫、目汁掙毋離个笑聲。

校慶結束該日，桌頂个乳茶、雞排做下分佢擲落垃圾桶肚，第一擺佢恁有決心，想自家絕對愛減肥成功。佢去網路尋減肥个方法，大體係講愛減量、減油、減糖，還愛配合適當个運動，因致該兜油坭坭个焗菜、甜滋滋<sup>2</sup>个汽水、糖全部分佢拒絕，逐餐飯菜盡量都食較清較齋兜，飯食七分飽斯好，還過逐日運動三十分鐘，行路、打球、跳索……間緊做。

一個月過後，吾姆帶佢去買新衫褲，逐領尺寸都減兩號，阿姆講：「從今以後使毋得過喊你『大箍牯』咧。」「係啊！你愛喊佢『派頭哥』哩啲。」

大箍牯減肥，成功！

<sup>1</sup> 白浮浮：音 pag` peu` peu`；白嫩嫩。

<sup>2</sup> 甜滋滋：音 tiam` zi` zi`；非常地甜。

109 年全國語文競賽客家語朗讀文章國小學生組（大埔腔）

編號 06 號

【好空】徐子涵原作

人講，笑頭笑面個人較有人緣；佢講，會講客話個細人還較得人惜。若係兩項加起來，斯會生出當多好空个事哦～！

社區个老老嫩嫩，佢比吾姆還較熟事；社區个事情，乜比佢還較了解。成半下攞兜菜、帶兜糖轉屋家，騙阿姆講係佢買个，佢都會相信。因致連佢都想毋著，無麼个原由會有人送東西分佢。無論係食个、著个、用个，抑係搞个，所有好空个，通棚都係吾好嘴碼同禮貌換來个。

對門九十六歲个阿太講，這下个細人，毋知係驚見笑抑係搵屎，已少像佢恁有笑神、恁會同人相借問个，所以特別惜佢，已安謐佢。佢輒輒會攞手喊佢過去，拿兜嚙嗒分佢食，佢講單淨佢正有恁好空。同佢講話，愛用客講，佢正聽得識，佢想怕斯因致恁泥，正無細人會同佢講話。三條巷个細人，單單佢一個有才調同佢搭半點鐘久，無講耗漿哦～！

莫看佢恁細，若係鐵馬落鏈、輪同球消風，佢都有法度毋使開錢去尋人搵手整、搵手嘮風。若係愛打翼毛球，也有大人伴陪佢搞，恁泥講，你斯知吾个朋友有幾多、年齡層有幾闊咧！

細人當自然斯會搞共下，毋使加講，佢愛講个係，該兜鄰舍做麼个會恁惜佢呢？該係佢當笑面，自動會同人打嘴鼓，還會同人搵手。比將講搵手倒垃圾、拚資源回收个東西、講兜笑科分人笑、講兜令賭厥等揣、講兜生趣个事情分厥等聽，連老伯姆來賣菜，佢都會搵手喊：「買菜哦～！愛買菜無？」微毛末節，講都講毋煞，吾个大人朋友斯係恁泥自細交陪來个，連吾姆都當欽服。

對巷口左幹上背个好額人，將公園起都當闊，新聞報導過後，有當多遊客來這位遠寮，漸漸也有人來擺攤做生理。佢輒輒會行俛去，人客來斯搵手招呼，無人客斯打嘴鼓，毋多知又熟事咧！已多遊客聽著佢講客，試著當親切，斯會加減買兜，你講，有生趣無？

佢自從都無想著笑神同講客會有麼个好空頭，毋過確實帶分佢已多好空哦！總講，這係一種當有成就个感覺。

# 109 年全國語文競賽客家語朗讀文章國小學生組（大埔腔）

編號 07 號

## 【剃頭】張美容原作

前幾日去剃頭店剃頭，看著一個兩、三歲個細人，為著剃頭噉去噉噉滾像刷豬個樣，大人細人做下搵都一身大汗，實在衰過正得。佢這下較大漢咧，剃頭該滿毋敢過噉，毋過還係已驚剃頭，也共樣恁惱剃頭！

佢驚剃頭，係因致佢當無膽，驚師傅手項該支剪刀同剃頭刀。見擺一坐上凳項，繫好剃頭巾，看著師傅擎緊剪刀對核佢，佢斯會嗶嗶掣<sup>1</sup>，試著過撇千年恁久咧，正剪好，堵堵想故下大氣等，師傅又擎核利利個剃頭刀愛來拷吾腦屎背<sup>2</sup>個毛腳咧，這下還較得人驚哦。佢驚都頸根緊鉤、屎肫在凳項扭來扭去，師傅緊拷、緊咄<sup>3</sup>佢毋好停動，無奈何，佢牙根齧緊、拳頭嫵搭核，由在人刷割。若係走得，佢定著會跋起腳走<sup>4</sup>，一分鐘都毋停途。唉！剃頭實在得人驚！

直直到三、四年生，吾膽較在<sup>5</sup>咧，無恁驚剃頭，噉變做惱剃

頭，因致師傅該張嘴當得人惱，總係在剃頭該滿，有個無個講講擎一千擔。怕係大家老鄰舍忒熟事咧，佢長在緊剃緊同佢打嘴鼓，一下問：「若個頭那毛落麼個肥，仰脣會生都恁靚、恁多？」一下又講：「營養毋好專門搵到頭那毛去，愛食較高大兜正有影哪！毋好像矮嫵車個樣矮咄咄<sup>6</sup>。」佢面皮薄、驚見笑，長在目珠瞞啊瞞詐無聽著，一肚懊惱想：「仰結煞！脣項個人定著在該笑佢咧啦！還惱！還惱！實在還惱剃頭。」

盡冤枉個係，有一擺師傅毋知仰脣，剪刀一溜，吾耳公嘎畀剪一空，血黏時流出來咧！師傅同佢膏藥，嘴項噉噉噉噉<sup>7</sup>講：「頭那毛恁多，當毋好剪。」仰脣噉變做佢毋著咧！轉到屋家想愛同阿姆使妮，無想著阿姆毋單淨無安慰佢，顛倒罵佢講：「毋恬恬坐緊分人剃！耳公無分人剪撇斯已該載咧！」限勢佢都愛噉毋得嘴扁咧，聽著阿姆恁泥講，黏時「哇」一聲噉出來。係使得，佢甘願鬢頭絞髻<sup>8</sup>也無愛去剃頭。

剃頭個齣事，幾個月斯愛過來一擺，還艱苦哪！佢日日想、日日望，想望遽遽大，使得像大人個樣，去電毛店剪頭那毛，腳蹺緊<sup>9</sup>，有冷氣好吹、有人同你捉龍，還有人滄茶分你食，毋知有幾好哪！

<sup>1</sup> 嗶嗶掣：音 bid` bid` ched`；不停發抖。

<sup>2</sup> 腦屎背：音 no` shi` boi`；後腦杓。

<sup>3</sup> 咄：音 dod`；喝斥。

<sup>4</sup> 跋起腳走：音 bag` ki` giog` zeu`；拔腿就跑。

<sup>5</sup> 在：音 cai`；穩固。

<sup>6</sup> 矮咄咄：音 e` dud` dud`；矮嘟嘟的。

<sup>7</sup> 噉噉噉噉：音 gau` gau` gau` gau`；嘟嘟噉噉。

<sup>8</sup> 鬢頭絞髻：音 nung` teu` gau` gi`；披頭散髮。

<sup>9</sup> 蹺緊：音 kau+ gin`；翹腳。



【阿咪<sup>1</sup>】李夢花原作

佢屋下從來就毋識畜狗、畜貓仔，一來係阿姆歸日做事無閒直掣，又愛無閒煮三餐；二來係佢當愛淨俐，畜狗摻貓仔驚怕會遭跳蚤。一直到老弟間房个天蓬頂，逐暗晡一群老鼠在該走來走去，並並磅磅<sup>2</sup>吵到佢睡毋得，正高不將摻上屋鄰舍捉一條細貓子，畜來打老鼠。

鄰舍个貓嫲這胎正降兩條，一條就係佢屋下這條，灰色間<sup>3</sup>白色摻豬肝色花啦花啦<sup>4</sup>，睺起來當精靈、當得人惜，佢兜喊佢「阿咪」。另外該條柑仔色間白色，乜異靚，分雜貨店个叔姆捉去畜。阿爸講新捉來个貓仔，定著愛綯到有四支桌腳个下背幾日仔，恁樣正會認屋，阿爸就摻佢綯到桌腳下。正經有影哦！幾日過放佢，阿咪就乖乖，毋會亂採走。

因為毋識畜過貓仔，阿姆乜毋知愛分佢食麼个？人講：貓愛食臊。阿姆就用四破魚攪飯飼。一站仔過後，阿爸講：「毋好分

佢食忒好、食忒飽，慣勢咧就毋會去打老鼠。」聽雜貨店个叔姆講佢屋下該條，就係食到肥固固，日日食飽睡、睡飽食，連老鼠在脣頭過，佢斯目珠擘開睺一下，又做佢睡。該幾日逐晨早，阿爸就去豬砧買一坵豬肝分阿咪食。第一擺豬肝買轉來，阿姆想愛提來煮熟，阿爸煞煞講：「分貓仔食生豬肝，係愛佢慣食生个味，正會去打老鼠，該下二擺佢打著个老鼠，你愛煮熟正分佢食係無？」阿爸講个異有理，佢兜聽了哈哈大笑。

阿咪日時頭走到倉庫睡，暗晡頭就係佢行動个時間，在暗摸脣疏个暗晡頭，睺著佢个目珠仁，像兩粒青色个寶石樣當金當靚，灶下个螟蜚趨來趨去，佢一爪搭一隻，非常流掠。就毋知佢曉打老鼠無？毋過，自阿咪來了以後，老弟間房个天蓬，就無老鼠在該跳舞咧。

毋多知仔，阿咪畜有十四年咧，照佢人个年紀算，佢有七十零歲咧。該日阿咪懶甥甥仔無精神，食个東西又嘔出來，好得睺獸醫注射過，幾日仔就好咧。阿姆笑笑仔對阿咪講：「你摻佢共樣，老咧！」阿咪當像聽得識樣，第二日打條細老鼠挑挑放在灶下，像係愛摻阿姆講：「莫笑佢老刀嫲無鋼——奈毋何，佢還異慶哪！」動物除了毋會講話，佢兜摻人共樣，係有感情、有靈性个，還有該種毋認老个打拚精神啊！

<sup>1</sup> 阿咪：音 a<sup>ˇ</sup> mi；專有名詞。貓的名字。

<sup>2</sup> 呼呼磅磅：音 bin bin bong bong；狀聲詞。形容老鼠在天花板跑動的聲響。

<sup>3</sup> 間：音 gam<sup>ˋ</sup>；混合摻雜。

<sup>4</sup> 花啦花啦：音 fa<sup>ˇ</sup> la<sup>ˇ</sup> fa<sup>ˇ</sup> la<sup>ˇ</sup>；形容顏色混雜花花的樣子。

109 年全國語文競賽客家語朗讀文章國小學生組（饒平腔）

編號 03 號

### 【大箍牯減肥記】曾菁怡原作

「哇！歸桌恁多好料！汽水、餅、披薩、雞卵糕、枝冰，還有佢最好食个焗菜、雞髀。」佢睺到無瞞目，口涎水強強會滴下來，該兜好料像摻佢攞手講：「遽遽來食，遽遽來食喎！」佢煞煞抓一支香噴噴个雞髀，該亮亮油油个皮焙到喇喇，肉汁水汀汀汀汀，實在還錫人那！就在佢嘴擘到大大，準備咬啊下去該下，嘎聽著：「大箍牯，還毋貽起？讀書會赴毋掣咧！」全部个好料一下嘎毋見忒，原來，係發夢啊！有一息毋願，該雞髀無咬著，實在還打爽噢！

聽佢姆講，佢從細就異好嘴斗，生到肥壘壘仔，幼皮白肉，當得人惜。公太就最愛捏佢个面頰卵，講佢像正打好个粢粢分人想愛咬一口。原本佢無感覺肥固固个身材有麼个毋好，但係該擺見笑个經驗分佢堅心愛減肥咧。

該日學校辦校慶活動，佢个班級表演「三條豬子」个話劇，佢係擔任豬大哥个角色。就在節目進行到豬大哥摻豬二哥為著閃避大野狼，愛走去豬老弟个屋園該下，為著有緊張个氣氛，佢盡命牯颯過去愛鑽入豬老弟个屋裡肚。麼人知，一下忒大力，豬老

弟个屋嘎分佢撞橫落去，佢還仆在屋面頂，屎脬翹到半天高，纏纏个褲弓到暴線縫……該時，鬧熱煎煎个禮堂忽然間變到一片恬靜，佢聽著自家砰砰个心跳聲，還有額頭流下來个汗水，每一滴佢就感覺得著……實在還見笑噢！愛仰結煞正好？落尾，有聲音摻佢解圍咧，佢遽遽企起來行到舞臺脣換褲；該聲音，毋係佢期待个拍手聲，係對佢緊顫、目汁雙流个笑聲。

校慶結束該日，桌頂个乳茶、雞排全部分佢擲到垃圾桶，佢第一擺落恁堅定个決心，絕對愛減肥成功。佢去網路尋減肥个方法，大體係減量、減油、減糖，還愛配合適當个運動，所以該兜油膩膩个焗菜、甜滋滋个汽水、糖仔全部分佢拒絕，逐餐飯菜都食較清、較齋兜，食到七分飽就好。佢還逐日運動三十分鐘，行路、爽球仔、跳索仔……逐日做無共樣个變化。

一隻月過後，佢姆帶等佢去買新衫褲，每一領都比原旦个尺寸細兩碼，阿姆講：「從今以後做毋得過喊你『大箍牯』咧！」  
「係啊！你愛喊佢『緣投哥』咧！」

大箍牯減肥，成功！

109 年全國語文競賽客家語朗讀文章國小學生組（饒平腔）

編號 06 號

【好空】徐子涵原作

人講，笑頭笑面个人較有人緣；佢講，會講客个細人仔較得人惜。係兩種加起來，就會變出當多好空个事情出來哦～！

社區肚个老老嫩嫩，佢比佢姆還較熟事；社區肚个事情，乜比佢還較瞭解。成時攞兜菜、帶兜糖仔轉屋，騙阿姆講係佢買个，佢都會相信。因為連佢都想毋著，無緣無故有麼儕會分佢。無論係食个、著个、用个，抑係爽个，所有好空个，通棚都係佢好嘴碼摺禮貌換來个。

對門九十六歲个阿太講，這下个細人仔，毋知係畏羞抑係搵屎，盡少像佢恁有笑容、恁會摺人相借問，所以特別惜佢，最阿謔佢。佢輒輒會搵手喊佢過去，提兜零嗒分佢食，佢講就佢正有恁好空。摺佢講話，全全愛用客話講，佢正聽得識，佢想怕係因為恁樣，正無細人仔愛摺佢講話。三條巷仔个細人仔，就單淨佢一儕做得摺佢謔多半點鐘久，無講花蓼哦～！

莫睭佢年紀還細，係自行車落鏈、輪仔摺球仔無風，佢自家就有辦法；毋使花錢去尋人搵手整、搵手嘮風。係愛打羽毛球，乜有大人仔伴陪佢爽，恁樣講，你就知佢个朋友有幾多、年齡層

有幾闊咧！

細人仔自然就會爽共下，毋使加講，愛講个係，該兜鄰舍做麼个會恁惜佢呢？該係因為佢當笑面，會摺人打嘴鼓，還會摺人搵手。比論講搵手漕垃圾、拚資源回收个東西、講兜笑科分人笑、講兜令仔分人搵、講兜心色个事情分人聽，就連老伯姆來賣菜，佢乜會搵手喊：「買菜哦～！愛買菜無咧？」微微末末个事，講都講毋會煞，佢个大人朋友就係恁樣從細交陪來个，連佢姆都當佩服。

對巷仔口左幹上去，有個好額人摺公園起到當闊，新聞報導過後，就當多遊客來遠奈，漸漸仔乜有人來擺攤仔做生理。佢輒輒會行兼去，見人客來就搵手，無人客就打嘴鼓，毋多知仔又熟事咧！異多遊客聽著佢講客，會試著當親切，就加買兜仔，你講，有心色無？

佢從來就毋識想過，面帶笑容摺講客會有麼个好空，毋過確實帶分佢異多好空！總講，這係一種當湛斗个感覺。

【剃頭】張美容原作

前幾日去剃頭店剃頭，睺著一個兩、三歲个細人仔，為著剃頭嘍到噉殺天<sup>1</sup>，大人細子全部斯搥到汗流脈絡，實在還衰過哪。佢這下較大咧，剃頭該下毋敢嘍，毋過還係當驚剃頭，乜共樣當惱剃頭！

佢驚剃頭，係因為佢當無膽，驚師傅手叮該支剪刀摺剃頭刀。見擺一坐落凳頂，冚好剃頭帕，睺著師傅擎等剪刀對等佢，佢就開始嘍嘍掣<sup>2</sup>，試著像過忒千年恁久，毛正剪好，堵堵想敌下大氣定，師傅又擎等利利个剃頭刀愛來刮佢腦屎背<sup>3</sup>个毛腳，這下還較得人畏咧。佢驚到頸根緊跣、屎肱在凳頂扭上扭下，師傅一頭刮、一頭咄<sup>4</sup>佢毋好停動，無奈何，佢牙根齧等、拳頭嫵搭等，由在人剮割。係走得，佢定著起腳花走<sup>5</sup>，一秒鐘就毋停跔。唉！剃頭實在得人驚！

到三、四年生起勢，膽較在<sup>6</sup>咧，無恁驚剃頭，嘎變做惱剃

頭，因為師傅該張嘴當得人惱，佢總係在摺佢剃頭該下，講講摺一千擔有个無个。可能大家係老鄰舍昶<sup>7</sup>熟事咧，佢長透緊剃緊摺佢打嘴鼓，一下問：「你个頭那毛落麼个肥，仰會生到恁靚、恁多？」一下又講：「營養毋好專門搵到頭那毛去，愛食較高大兜正有影哪！毋好像矮嫵車樣矮佢佢<sup>8</sup>。」佢面皮薄、驚見笑，長透目珠眨等詐無聽著，一肚懊躁想：「仰結煞！脣頭个人定著在該笑佢咧啦！還惱！還惱！實在還惱剃頭。」

最冤枉个係，有一擺師傅毋知仰般，剪刀一溜<sup>9</sup>，嘎摺佢个耳空剪隻空，血黏時流出來。師傅一頭摺佢膏藥仔，一頭嘍嘍嘍講：「頭那毛恁多，當毋好剪。」仰般嘎變做佢个錯！轉到屋下想愛摺阿姆做嬌，無想著阿姆毋單淨無安慰佢，顛倒罵佢講：「毋恬恬坐等分人剃哪！耳空無分人剪忒斯異好咧。」限勢佢愛嘍毋得嘴扁，聽著阿姆恁樣講，黏皮「哇」一聲嘍出來。係做得，佢甘願鬢頭髻披<sup>10</sup>乜無愛去剃頭。

剃頭个齣數，幾隻月斯愛再過來一擺，還艱苦哪！佢日日想、日日望，想望煞煞大，做得像大人樣，去電毛店剪頭那毛，腳交等，有冷氣好吹、有人摺你捉龍，還有人滄茶分你食，毋知幾好哪！

<sup>1</sup> 噉殺天：音 ve vong sad` tien`；大聲哭喊

<sup>2</sup> 嘍嘍掣：音 bid` bid` chad`；不停發抖。

<sup>3</sup> 腦屎背：音 no` shi` boi`；後腦杓。

<sup>4</sup> 咄：音 doi；喝斥。

<sup>5</sup> 起腳花走：音 hi` giog` fa` zeu`；拔腿就跑。

<sup>6</sup> 在：音 cai`；穩固。

<sup>7</sup> 昶：音 tiong`；太。

<sup>8</sup> 矮佢佢：音 e` dud` dud`；矮嘟嘟的。

<sup>9</sup> 溜：音 tiu`；滑開。

<sup>10</sup> 鬢頭髻披：音 nung teu gi` pe`；披頭散髮。

109 年全國語文競賽客家語朗讀文章國小學生組（詔安腔）

編號 02 號

【阿咪】李夢花原作

佢屋下自底攞毋識供狗供貓，一來係阿依歸日做事無閒挾掣，攞愛無閒煮三頓，二來係佢真愛淨俐，供狗供貓驚會生蟲嫲。一直到阿弟房間个天蓬竦，逐暗夜一陣老鼠在遐走來走去，乒乒乓乓吵到佢毋會睡，正不得已枷上屋个屋邊，捉一隻貓么來捉老鼠。

屋邊个貓嫲這胎正降兩隻，一隻即係佢屋下這隻，普色合白色和豬肝色花花花，睺起來真精、真得人惜，佢人喊佢「阿咪」。另外遐隻柑子色合白色，嘛真靚，得雜貨店个阿孀捉去供。阿怙講新捉來个貓，定著愛罔在有四支桌腳个桌下幾下日，按正會認屋，阿怙即枷佢罔在桌腳下。正經有影哦！幾下日過枷放，阿咪即乖乖乖，毋會亂使走。

因為毋識供過貓，阿依嘛毋知討得佢食麼个？人講：貓愛食臊。阿依即用魚脯攪飯飼。一站仔過後，阿怙講：「毋好得佢食傷好食忒飽，慣勢啊即毋會去捉老鼠。」聽雜貨店个阿孀講佢屋下遐隻，即係食到肥油油，逐日食飽睡、睡飽食，連老鼠在脣頭過，佢正目珠擘開睺一下，又做佢睡。遐幾下日逐晨早，阿怙即

去豬砧買一坵豬肝得阿咪食。第一擺豬肝買轉來，阿依討提來煮熟，阿怙煞著講：「得貓食生豬肝，係愛佢慣勢食生个味，正會去捉老鼠，後次擺佢捉著个老鼠，你討煮熟正得佢食係無？」阿怙講个真有理，佢人聽了哈哈大笑。

阿咪日時頭走到倉庫睡，暗夜時即係佢行動个時間，在暗摸摸个暗夜，睺著佢个目珠仁，像兩粒青色个寶石真金真靚，灶下个黃蜚趨來趨去，佢一爪捉一隻，十分流掠。即毋知佢會曉捉老鼠無？毋過，自阿咪來了後，阿弟間房个天蓬，即無老鼠在遐跳舞啊。

不知不覺，阿咪供有十四年啊，照佢人个年歲來算，佢有七十空歲啊。遐日睺佢懶懶無精神，食个物件又吐出來，好佳載得獸醫睺過注射過，幾下日即好啊。阿依笑笑个對阿咪講：「你和佢共款，老啊。」阿咪真像聽識，第二日捉一隻細隻老鼠挑持罔在灶下，像係討枷阿依講：「莫笑佢老刀嫲無鋼——毋奈何，佢猶攞真慶！」動物除了毋會講事，佢人和人共款，係有感情有靈性个，猶有遐種毋認老个打拚精神。

109 年全國語文競賽客家語朗讀文章國小學生組（詔安腔）

編號 03 號

### 【大箍呆減肥記】曾菁怡原作

「哇！歸桌恁多好料！汽水、餅、披薩、雞卵糕、枝子冰，猶有佢頭愛食个炸菜、雞髀。」佢睺到無瞞目，口涎水硬硬討滴落來，遐兜好料像拗佢攞手講：「較緊來食，較緊來食哦！」佢煞煞擎一支香噴噴个雞髀，遐油金油金个皮烘到赤赤，肉汁汀汀汀汀，實在真錫人！即在佢嘴擘到大大，準備咬落去个時，嘎聽著：「大箍呆，猶毋跋起來？讀書討毋會赴啊！」全部个好料一下嘎毋見去，幾時，係發夢啊！有一兜仔毋甘願，遐雞髀無咬著，實在真無採啊！

聽佢依講，佢自細即真好嘴斗，生到肥油油，幼皮白肉，真得人惜。阿太即真愛捏佢个嘴顫，講佢像正舂好个菜得人想討咬一口。原本佢無感覺肥油油个身材有麼个無好，毋過遐擺見笑个經驗得佢堅心愛減肥啊。

遐日學校辦校慶活動，佢个班級表演「三隻豬么」个話劇，佢係擔任豬大哥个角色。即在節目進行到豬大哥和豬二哥為著閃避大野狼，討走去豬阿弟个屋藏个時，為著有緊張个氣氛，佢拚命從過去討鑽入豬阿弟个屋內底。仰子會知，一下傷大力，豬阿

弟个屋嘎得佢撞倒去，佢猶仆在屋面上，屎肱翹到半天高，纏繃繃个褲弓到裂線縫……遐時，鬧熱滾滾个禮堂好定泥變到一片恬卒卒，佢猶聽會著自家砰砰嘍个心跳聲，額頭流落來个汗，逐滴佢攞感覺會著……實在真見笑哦！愛仰子正好？落尾，有聲音拗佢解圍啊，佢攞緊企起來行到舞臺脣換褲；遐聲音，毋係佢期待个拍手聲，係大家笑到歸身直直震、目汁雙流个笑聲。

校慶煞遐日，桌岫个奶茶、雞排做一下得佢拗到垃圾桶，佢第一擺有恁堅定个決心，定著愛減肥成功。佢去網路尋減肥个方法，大概係減量、減油、減糖，猶愛配合適當个運動，所以遐兜油潑潑个炸菜、甜漬漬个汽水、糖全部得佢拒絕，逐頓飯菜攞食較清較多菜兜，食到七分飽即好。佢猶逐日運動三十分鐘，行路、打球、跳索……逐日做無共款个變化。

一個月過後，佢依渡佢去買新衫褲，逐領个寸尺攞減兩號，阿依講：「對今日開始毋會用攞喊你『大箍呆』啊。」「係啊！你愛喊佢『緣投哥』啊。」

大箍呆減肥，成功！

109 年全國語文競賽客家語朗讀文章國小學生組（詔安腔）

編號 06 號

【好空】徐子涵原作

人講，笑頭笑面個人較有人緣；佢講，會講客个細子較得人惜。若係兩種加起來，即會變出真多好空个事情出來哦～！

社區內底个老老嫩嫩，佢比佢依猶較熟事；社區內底个事情，嘛比佢猶較了解。有時務攞一兜仔菜、拵一兜仔糖轉屋下，惑阿依講係佢買个，佢攞會信。因為連佢都想毋會著，無原無因有麼儕會得佢。無論係食个、著个、用个，抑係賞个，所有好空个，歸下攞係佢好嘴碼和禮貌換來个。

對門九十六歲个婆太講，這滿个細子，毋知係驚見笑抑係搵屎，真少像佢恁有笑容、恁會和人相借問，所以特別惜佢，真安謐佢。佢輒輒會攞手喊佢過去，拵一兜仔四秀得佢食，佢講即佢正有恁好空。和佢講事，做一下愛用客事講，佢正聽會識，佢想驚係因為按，正無細子討和佢講事。三條巷个細子，即單單佢一儕會用和佢答訖半點鐘久，無講花舌哦～！

莫睭佢年歲猶細漢，若鐵馬敲鏈、輪和球無風，佢自家即有辦法毋使開錢去尋人鬥相共修理、鬥相共灌風。若討打羽毛球，嘛有大人和佢賞，按講，你即知佢个朋友有幾多、年歲緣有幾闊

啊！

細子自然即會賞作埕，毋使加講，討講个係，遐兜屋邊做麼个會恁惜佢呢？遐係因為佢真笑面，會和人答嘴鼓，猶會拗人鬥相共。比論講鬥相共漕垃圾、拵資源回收个物件、講一兜仔好笑个得人笑、講一兜仔謎猜得佢人臆、講一兜仔心色个事情得佢人聽，就連老伯嚶來賣菜，佢嘛會鬥相共喝：「買菜哦～！討買菜無？」微微末末，講都講毋得煞，佢个大人朋友即係按自細交陪來个，連佢依攞真佩服。

對巷口左幹起去个有錢人拗公園起到真闊，新聞報導過後，即真多遊客來賞祭，漸漸嘛有人來排擔做生理。佢輒輒會行偈去，人客來即鬥相共，無人客即答嘴鼓，不知不覺又熟事啊！真多遊客聽著佢講客，會因為感覺真親切，即加買一兜，你講，有心色無？

佢自底攞無想著面帶笑容和講客會有麼个好空，毋過確實帶得佢真多好空！總講，即係一種真好个感覺。

# 109 年全國語文競賽客家語朗讀文章國小學生組（詔安腔）

編號 07 號

## 【剃頭】張美容原作

前幾下日去剃頭店剃頭，睺著一個兩、三歲个細子，為著剃頭嘍到哀天哀地，大人細子做一下舞到流汗溶滴，實在真苦憐。佢這滿較大漢啊，剃頭个時毋敢嘍，毋過猶係恁驚剃頭，嘛共款恁感剃頭！

佢驚剃頭，係因為佢真無膽，驚師傅手底遐支剪刀和剃頭刀。見擺一坐落凳面上，圍好剃頭巾，睺著師傅擎著剪刀對著佢，佢即開始嘍嘍掣<sup>1</sup>，感覺像過千年恁久頭那毛正剪好，堵好想討故一下大氣定，師傅又擎著利利个剃頭刀討來副佢後頭敲个毛腳，這下猶較得人驚。佢驚到頸直直跑、屎肫在凳面上扭來扭去，師傅著面副、著面喝佢毋好停動，無奈何，佢牙根咬个、拳頭嫵搭个，隨在人剝割。若會用走，佢定著起腳步走<sup>2</sup>，一分鐘攞毋會踟躕著。唉！剃頭實在得人驚！

到三、四年級个起頭下，膽較在<sup>3</sup>啊，無恁驚剃頭，嘎變做感剃頭，因為師傅遐支嘴真得人感，佢總係在拗佢剃頭个時，講講

一兜有个無个。可能大家係老屋邊過頭熟事啊，佢不時著面剃著面和佢答嘴鼓，一下問：「你个頭那毛落麼个肥，仰子會生到恁靚、恁多？」一下又講：「營養毋好專門搗到頭那毛去，愛食較高兜正有影！毋好像轎車矮佗佗<sup>4</sup>。」佢面皮薄、驚見笑，不時目珠眨眨假無聽著，一食肚苦感想：「愛仰子正好！脣頭个人定著在遐笑佢啦！真感！真感！實在真感剃頭。」

頭冤枉个係，有一擺師傅毋知仰子，剪刀一溜<sup>5</sup>，嘎拗佢个耳子剪一空，血黏時流出來。師傅著面拗佢膏藥，著面唸唸講：「頭那毛恁多，真無好剪。」仰子嘎變做佢个毋著！轉到屋下想討拗阿依使妮，無想著阿依毋單無安慰佢，顛倒罵佢講：「毋恬恬坐蹠得人剃！耳子無得人剪莫即真好啊。」佢已經討嘍攞毋得嘴扁，聽著阿依按講，黏時「哇」一聲嘍出來。若係會用，佢甘願頭那毛鬢鬢<sup>6</sup>嘛無愛去剃頭。

剃頭个事，幾下個月即愛攞來一擺，真艱難呢！佢日日想、日日望，想望快快大漢，會用像大人按，去電頭那毛店剪頭那毛，腳翹蹠，有冷氣好吹、有人拗你捉龍，猶有人滄茶得你淋，毋知有幾好咧！

<sup>1</sup> 嘍嘍掣：音 bi bi cheed'；不停發抖。

<sup>2</sup> 起腳步走：音 ki' gio' pu zeu'；拔腿就跑。

<sup>3</sup> 在：音 zai；穩固。

<sup>4</sup> 矮佗佗：音 e' dud' dud'；矮小的。

<sup>5</sup> 溜：音 liu'；滑開。

<sup>6</sup> 頭那毛鬢鬢：音 teu' na' hm' sam' sam'；頭髮蓬鬆散亂。